

大智度論

第三十二

二百十一
名二

44868



Vertical text or seal impression on the left side, possibly containing characters like '天' and '地'.



大智度論卷第三十二

龍樹菩薩造

姚秦三藏法師鳩摩羅什譯

釋初品中四緣義第四十

菩薩摩訶薩欲知諸法因緣次第緣緣緣增
上緣當學般若波羅蜜一切有為法皆從四
緣生所謂因緣次第緣緣緣增上緣因緣者

相應因共生因自種因遍因報因是五因名
為因緣復次一切有為法亦名因緣次第緣
者除阿羅漢過去現在末後心心數法諸餘
過去現在心心數法能與次第是名次第緣
緣緣增上緣者一切法復次菩薩欲知四緣
自相共相當學般若波羅蜜問曰如般若波

羅蜜中四緣皆不可得所以者何若因中先
有果是事不然因中先無亦不然若先有則
無因若先無以何爲因若先無而有者亦可
從無因而生復次見果從因生故名之爲因
若先無果云何名因復次若果從因生果則
屬因因不自在更屬餘因若因不自在者云
何言果但從此因生如是種種則知無因緣
又過去心心數法都滅無所能作云何能爲
次第緣現在有心則無次第若與未來欲生
心次第者未來則未有云何與次第如是等
則無次第緣如一切法無相無緣云何言緣
緣若一切法無所屬無所依皆平等云何言

增上緣如是四緣不可得云何說欲知四緣
當學般若波羅蜜

荅曰汝不知般若波羅蜜相以是故說般若
波羅蜜中四緣皆不可得般若波羅蜜於一
切法無所捨無所破畢竟清淨無諸戲論如
佛說有四緣但以少智之人著於四緣而生
邪論爲破著故說言諸法實空無所破如心
法從內外處因緣和合生是心如幻如夢虛
誑無有定性心數法亦如是是心共生心數
法所謂受想思等是心數法同相同緣故名爲
相應心以心數法相應爲因心數法以心相
應爲因是名相應因相應因者譬如親友知

識和合成事共生因者一切有爲法各有共
生因以共生故更相佐助譬如兄弟同生故
互相成濟自種因者過去善種現在未來善
法因過去現在善種未來善法因不善無記
亦如是如是一切法各有自種因遍因者苦
諦集諦所斷結使一切垢法因是名遍因報
因者行業因緣故得善惡果報是爲報因是
五因名爲因緣心心數法次第相續無間故
名爲次第緣心心數法緣塵故生是名緣緣
諸法生時不相障礙是爲無障復次心心數
法從四緣生無想滅盡定從三緣生除緣緣
諸餘心不相應諸行及色從二緣生除次第

緣緣緣有爲法性羸故有從一緣生報生心
心數法從五因生不隱沒無記非垢法故除
遍因諸煩惱亦從五因生除報因何以故諸
煩惱是隱沒報是不隱沒故除報因報生色
及心不相應諸行從四因生非心心數法故
除相應因不隱沒無記法故除遍因染汙色
及心不相應諸行亦從四因生非心心數法
故除相應因垢故除報因諸餘心心數法除
初無漏心皆從四因生除報因遍因所以者
何非無記故除報因非垢故除遍因諸餘不
相應法所謂色心不相應諸行若有自種因
則從三因生除相應因報因遍因若無自種

因則從二因生共生因無障因初無漏心心
數法從三因生相應因共生因無障因是初
無漏心中色及心不相應諸行從二因生共
生因無障因無有法從一因生若六因生是
名四緣菩薩行般若波羅蜜如是觀四緣心
無所著雖分別是法而知其空皆如幻化幻
化中雖有種種別異智者觀之知無有實但
誑於眼為分別知凡夫人法皆是顛倒虛誑
而無有實故有四緣如是云何為實賢聖法
因從凡夫法生故亦是不實如先十八空中
說菩薩於般若波羅蜜中無有一法定性可
取故則不可破以衆生著因緣空法故名爲

可破譬如小兒見水中月心生愛著欲取而不能得心懷憂惱智者教言雖可眼見不可手捉但破可取不破可見菩薩觀知諸法從四緣生而不取四緣中定相四緣和合生如水中月雖為虛誑無所有要從水月因緣生不從餘緣有諸法亦如是各自從因緣生亦無定實以是故說菩薩欲如實知因緣次第緣增上相當學般若波羅蜜問曰若欲廣知四緣應學阿毗曇云何此中欲知四緣義當學般若波羅蜜答曰阿毗曇四緣義初學如得其實求之轉深入於邪見如上破四緣義中說復次諸法所因因於四緣四緣復何所

因若有因則無窮若無窮則無始若無始則
無因若然者一切法皆應無因若有始始則無
所因若無所因而有則不待因緣若然者一
切諸法亦不待因緣而有復次諸法從因緣
生有二種若因緣中先有則不待因緣而生
則非因緣若因緣中先無則無各各因緣以
戲論四緣故有如是等過如般若波羅蜜不
可得空無如是等失如世間人耳目所覩生
老病死是則為有細求其相則不可得以是
故般若波羅蜜中但除邪見而不破四緣是
故言欲知四緣相當學般若波羅蜜欲知諸
法如法性實際當學般若波羅蜜舍利弗善

薩塵訶薩應如是任般若波羅蜜諸法如有
二種一者各各相二者實相各各相者如地
堅相水濕相火熱相風動相如是等分別諸
法各自有相實相者於各各相中分別求實
不可得不可破無諸過失如自相空中說地若
實是堅相者何以故膠牘等與火會時捨其
自性有神通人入地如水又分散木石則失
堅相又破地以爲微塵以方破塵終歸於空
亦失堅相如是推求地相則不可得若不可
得其實皆空空則是地之實相一切別相皆
亦如是是名爲如法性者如前說各各法空
空有差品是爲如同爲一空是爲法性是法

性亦有二種一者用無著心分別諸法各自
有性二者名無量法所謂諸法實相如持心
經說法性無量聲聞人雖得法性以智有量
故不能無量說如人雖到大海以器小故不
能取無量水是為法性實際者以法性為實
證故為際又如阿羅漢名為住於實際問曰如法
性實際是三事為一為異若一云何說三若
三今應當分別說答曰是三皆是諸法實相
異名所以者何凡夫無智於一切法作邪觀
所謂常樂我淨實我等佛弟子如法本相觀是
時不見常是名無常不見樂是名苦不見淨
是名不淨不見實是名空不見我是名無我

若不見常而見無常者是則妄見見見苦空無
我不淨亦如是是名爲如如者如本無能敗
壞以是故佛說三法爲法印所謂一切有爲法
無常印一切法無我印涅槃寂滅印問曰是
三法印般若波羅蜜中悉皆破壞如佛告須
菩提若菩薩摩訶薩觀色常不行般若波羅
蜜觀色無常不行般若波羅蜜苦樂我無我
寂滅非寂滅亦如是如是云何名法印答曰二經
皆是佛說如般若波羅蜜經中了了說諸法
實相有人著常顛倒故捨常見不著無常相
是名法印非謂捨常者無常者以爲法印我
乃至寂滅亦如是般若波羅蜜中破著無常

等見非謂破不受不著得是諸法如已則入
法性中滅諸觀不生異信性自尔故譬如小
兒見水中月入水求之不得便愁智者語言
性自尔莫生憂惱善入法性是為實際問曰
聲聞法中何以不說是如法性實際而摩訶
衍法中處處說答曰聲聞法中亦有說處但
少耳如雜阿含中說有一比丘問佛十二因
緣法為是佛作為是餘人作佛告比丘我不
作十二因緣亦非餘人作有佛無佛諸法如
法相法位常有所謂是事有故是事有是事
生故是事生如無明因緣故諸行諸行因緣
故識乃至老死因緣故有憂悲苦惱是事無

故是事無是事滅故是事滅如無明滅故諸
行滅諸行滅故識滅乃至老死滅故憂悲苦
惱滅如是生滅法有佛無佛常亦是處說如
如雜阿含舍利弗師子吼經中說佛問舍利
弗一句義三問三不能答佛少開示舍利弗
已入於靜室舍利弗集諸比丘語諸比丘言
佛未示我事端未即能答今我於此法七日
七夜演說其事而不窮盡復有一比丘白佛
佛入靜室後舍利弗作師子吼而自讚歎佛
語比立舍利弗語實不虛所以者何舍利弗
善通達法性故聲聞法中觀諸法生滅相是
爲如滅一切諸觀得諸法實相是處說法性

問曰是處但說如法性何處復說實際答曰
此二事有因緣起故說實際無因緣故不說
問曰實際即是涅槃爲涅槃故佛說十二部
經云何言無因緣答曰涅槃種種名字說或
名爲離或名爲妙或名爲出如是等則爲說
實際但不說名字故言無因緣復次諸法如
者如諸法未生時生時亦如是生已過去現
在亦如是諸法三世平等是名爲如問曰若
未生法名爲未生法現在則有法可用因
現在法有事用相故追憶過事是名過去三
世各異不應如實爲一云何言三世平等是
名爲如答曰諸法實相中三世等一無異如

般若波羅蜜如品中說過去如未來如現在
如如來如一如無有異復次先論議中已破
生法若無生者未來現在亦無生云何不等
又復過去世無始未來世無後現在世無任
以是故三世平等名為如行是如已入無量
法性中法性者法名涅槃不可壞不可戲論
法性名本分種如黃石中有金性白石中有
銀性如是一切世間法中皆有涅槃性諸佛
賢聖以智慧方便持戒禪定教化引導令得
是涅槃法性利根者即知是諸法皆是法性
譬如神通人能變瓦石皆使為金鈍根者方
便分別求之乃得法性譬如大冶鼓石然後

得金復次如水性下流故會歸於海合爲一味諸法亦如是一切摠相別相皆歸法性同爲一相是名法性如金剛在山頂漸漸穿下至金剛地際到自性乃止諸法亦如是智慧分別推求已到如中從如入自性如本未生滅諸戲論是名爲法性又如犢子周障嗚呼得毋乃止諸法亦如是種種別異取捨不同得到自性乃止無復過處是名法性實際者如先說法性名爲實入處名爲際復次一一法有九種一者有體二者各各有法如眼耳雖同四大造而眼獨能見耳無見功又如火以熱爲法而不能潤三者諸法各有力如火

以燒為力水以潤為力四者諸法各自有因
五者諸法各自有緣六者諸法各自有果七
者諸法各自有性八者諸法各有限礙九者
諸法各各有開通方便諸法生時體及餘法
凡有九事知此法各各有體法具足是名世
間下如知此九法終歸變異盡滅是名中如
譬如如此身生從不淨出雖復澡浴嚴飾終歸
不淨是法非有非無非生非滅滅諸觀法究
竟清淨是名上如復次有人言是九事中有
法者是名如譬如地法堅重水法冷濕火法
熱照風法輕動心法識解如是等法名為如
如經中說有佛無佛如法相法位常住世間

所謂無明因緣諸行常如本法法性者是九法中性實際者九法中得果證復次諸法實相常住不動衆生以無明等諸煩惱故於實相中轉異邪曲諸佛賢聖種種方便說法破無明等諸煩惱令衆生還得實性如本不異是名爲如實性與無明合故變異則不清淨

若除却無明等得其真性是名法性清淨實際名入法性中知法性無量無邊最爲微妙更無有法勝於法性出法性者心則滿足更不餘求則便作證譬如行道日日發引而不止息到所至處無復去心行者住於實際亦復如是如羅漢辟支佛住於實際縱復恒沙

諸佛爲其說法亦不能更有增進又不復生
三界若菩薩入是法性中玄知實際若未具
足六波羅蜜教化衆生亦時苦證妨成佛道
是時菩薩以大悲精進力故還修諸行復次
知諸法實相中無有常法無有樂法無有我
法無有實法亦捨是觀法如是等一切觀法
皆滅是爲諸法實如涅槃不生不滅如本末
生譬如水是冷相假火故熱若火滅熱盡還
冷如本用諸觀法如水得火若滅諸觀法如
火滅水冷是名爲如如實常住何以故諸法
性自尔譬如一切色法皆有空分諸法中皆
有涅槃性是名法性得涅槃種種方便法亦

名爲法性若得證時如法性則是實際復次
法性者無量無邊非心心數法所量是名法
性妙極於此是名真際

復次舍利弗菩薩摩訶薩欲數知三千大千
世界中大地諸山微塵當學般若波羅蜜菩
薩摩訶薩折一毛爲百分欲以一分毛盡舉
三千大千世界中大海江河池泉諸水而不
擾水性當學般若波羅蜜三千大千世界中
諸火一時皆然譬如劫盡燒時菩薩摩訶薩
欲一吹令滅當學般若波羅蜜三千大千世
界中諸大風起欲吹破三千大千世界及諸
須彌山如摧腐草菩薩摩訶薩欲以一指障

其風力令不起者當學般若波羅蜜問曰佛
何以不讚歎諸菩薩六度等諸功德而讚歎
此大力荅曰衆生有二種一者樂善法二者
樂善法果報爲樂善法者讚歎諸功德爲樂
善法果報者讚歎大神力復次有人言四大
之名其實亦無邊無盡常在世故無能悉動
量其多少人雖造作城郭臺殿所用甚少地
之廣大載育萬物最爲牢固爲是故佛說三
千大千世界中地及須彌諸山微塵皆欲盡
知其數及微塵中衆生業因緣各各有分欲
知其多少當學般若波羅蜜問曰一石土之
微塵尚難可數何況三千大千世界地及諸

山微塵之數是不可信。答曰：聲聞辟支佛、智慧尚不能知，何況凡夫？是事諸佛及大菩薩所知。如法華經說譬喻三千大千世界地及諸山末，以為塵。東方過千世界，下一塵如是。過千世界，復下一塵如是。盡三千世界，諸塵佛告比丘，是塵數世界，筭數筭量，可得知。不諸比丘言不可得知。佛言：所可著微塵，不著微塵。諸國盡，皆末以為塵。大通慧佛出世已來，劫數如是如是。無量恒沙等世界，微塵佛大菩薩皆悉能知。何況一恒河等世界，復次無量者，隨人心說。如大海水，名為無量而深八萬由旬。大身羅睺阿脩羅王，量其多少，尚

不以爲難問曰云何行般若波羅蜜得是智
慧答曰有人行般若波羅蜜滅諸煩惱及邪
見戲論入菩薩甚深禪定念智清淨增廣故
則能分別一切諸色微塵知其量數復次諸
佛及大菩薩得無礙解脫故過於事尚不以
爲難何況於此復次有人謂地爲牢堅心無
形質皆是虛妄以是故佛說心力爲大行般
若波羅蜜故散此大地以爲微塵以地有色
香味觸重故自無所作水少香故動作勝地
火少香味故勢勝於水風少色香味故動作
勝火心無四事故所爲力大又以心身煩惱
結使繫縛故令心力微少有漏善心雖無煩

惱以心取諸法相故其力亦少二乘無漏心
雖不取相以智慧有量及出無漏道時六情
隨俗分別取諸法相故不盡心力諸佛及大
菩薩智慧無量無邊常處禪定於世間涅槃
無所分別諸法實相其實不異但智有優劣
行般若波羅蜜者畢竟清淨無所罣礙一念
中能數十方一切如恒河沙等三千大千世
界大地諸山微塵何況十方各一恒河沙世
界復次若離般若波羅蜜雖得神通則不能
如上所知以是故說欲得是大神力當學般
若波羅蜜復有人言一切諸物中水為最大
所以者何大地上下四邊無不有水若護世

天主不節量天龍雨又無消水珠者則天地
漂沒又以水因緣故世間衆生數非衆生數
皆得生長以是可知水爲最大是故佛說菩
薩欲知水滂多少滂滂分散令無力者當學
般若波羅蜜復有人言火爲最大所以者何
除香味故又以水出處甚多而火能滅之尤
火之力能燒萬物能照諸闇以是故知火爲
最大是故佛說菩薩欲吹滅大火者當學般
若波羅蜜問曰火因於風乃得然熾云何相
滅荅曰雖復相因過則相滅問曰若尔者火
多無量口風甚少何能滅之荅曰菩薩行般
若波羅蜜因禪定得神通能變身令大口風

亦大故能滅之又以神力小風能滅譬如小金剛能摧破大山以是故諸天世人見此神力皆悉崇伏復次菩薩以火爲害處廣憐愍衆生故以神力滅之又以三千世界成立甚難菩薩福德智慧故力能制之復有人言於四大中風力最大無色香味故動相最大所以者何如虛空無邊風亦無邊一切生有成敗皆由於風大風之勢摧破三千大千世界諸山以是故佛說能以一指障其風力當學般若波羅蜜所以者何般若波羅蜜實相無量無邊能令指力如是菩薩摩訶薩欲一結加趺坐悉滿三千大千世界中虛空者當學

般若波羅蜜問曰菩薩以何因緣故如是結
加趺坐荅曰以梵天王主三千世界生那見
心自以爲大見菩薩結加趺坐遍滿虛空則
憍慢心息又於神通力中巧方便故一能爲
多多能爲一小能作大大能作小亦爲欲現
希有難事故坐遍虛空亦爲遮諸鬼神龍王
惱亂衆生故坐滿虛空令衆生安隱如難陀
婆難陀龍王兄弟欲破舍婆提城兩諸兵仗
毒虵之屬是時目連端坐遍滿虛空變諸害
物皆成華香瓔珞以是故說菩薩摩訶薩欲
一結加趺坐遍滿三千大千世界虛空當學
般若波羅蜜菩薩摩訶薩欲以一毛舉三千

大千世界中諸須彌山王擲過他方無量阿
僧祇諸佛世界不擾衆生問曰菩薩何以故
舉須彌山及諸山過著他方無量世界荅曰
不必有舉者此明菩薩力能舉之耳復次諸
菩薩爲佛當說法故先莊嚴三千大千世界
除諸山令地平整如法華經中說佛欲集諸
化佛故先平治地亦欲現希有事令衆生見
故所以者何一須彌山高八万四千由旬若
舉此一山已爲希有何況三千大千世界百
億須彌山若以一毛舉三千大千世界百億
須彌山尚難何況以一毛頭擲百億須彌山
過無量阿僧祇世界衆生見菩薩希有事皆

發阿耨多羅三藐三菩提心作是念言是菩薩未成佛道神力乃尔何況成佛以是故如是說欲以一食供養十方各如恒河沙等諸佛及僧當學般若波羅蜜欲以一衣華香瓔珞末香塗香燒香燈燭幢幡華蓋等供養諸佛及僧當學般若波羅蜜問曰菩薩若以一食供養一佛及僧尚是難事何況十方如恒河沙等諸佛及僧答曰供養功德在心不在事也若菩薩以一食大心悉供養十方諸佛及僧亦不以遠近爲礙是故諸佛皆見皆受問曰諸佛有一切智故皆見皆受僧無一切智云何得見云何得受答曰僧雖不見不知

而其供養施者得福譬如有人遣使供養彼人彼人雖不得而此人已獲施福如慈三昧於衆生雖無所施而行者功德無量復次諸菩薩無量無盡功德成就以一食供養十方諸佛及僧皆悉充足而亦不盡譬如涌泉出而不竭如文殊尸利以一鉢歡喜丸供養八萬四千僧皆悉充足而亦不盡復次菩薩於此以一鉢食供養十方諸佛而十方佛前飲食之具具足而出譬如鬼神得人一口之食而千万倍出復次菩薩行般若波羅蜜得無量禪定門及得無量智慧方便門以是故無所不能以般若波羅蜜無礙故是菩薩心所

作亦無礙是菩薩能供養十方千萬億恒河沙等諸佛及僧何況各如一恒河沙衣服華香瓔珞末香塗香燒香燈燭幢幡華蓋等亦如是復次舍利弗菩薩摩訶薩欲使十方各如恒河沙等世界中衆生悉具於戒三昧智慧解脫解脫知見令得須陀洹果斯陀含果阿那含果阿羅漢果乃至令得無餘涅槃當學般若波羅蜜五衆義如先說須陀洹果有二種一者佛說三結斷得無爲果又如阿毗曇說八十八結斷得無爲須陀洹果二者信行法行人住道比智中得須陀洹果證者是復次須陀名流即是八聖道分般那名入入

是八聖道分流入涅槃是名初觀諸法實相
得入無量法性分墮聖人數中息忌名一伽
彌名來是人從此死生天上天上一來得盡
衆苦阿那名不伽彌名來是名不來相是人
欲界中死生色界無色界中於彼漏盡不復
來生問曰今世滅阿那伽彌中滅阿那伽彌
此亦不生色無色界何以名爲阿那伽彌答
曰阿那伽彌多生色無色界中現在滅者少
以少從多故中間滅者亦欲生色界見後身
可患即取涅槃以是故因多得名阿羅漢盡
一切煩惱故應受一切天龍鬼神供養是阿
羅漢有九種退法不退法死法護法住法勝

進不壞法慧解脫共解脫九種義如先說及
八背捨八勝處十一切處滅盡定無諍三昧
願智等阿羅漢諸妙功德及得無餘涅槃無
餘涅槃名阿羅漢捨此五衆更不復相續受
有五衆身心苦皆悉永滅後三道果如初道
說復次舍利弗菩薩摩訶薩行般若波羅蜜
布施時應作是分別如是布施得大果報如
是布施生刹利大姓婆羅門大姓居士大家
如是布施生四天王天處三十三天夜摩天
兜率陀天化樂天化自在天因是布施得入
初禪二禪三禪四禪無邊空處無邊識處無
所有處非有想非無想處因是布施能生八

聖道分因是布施能得須陀洹道乃至佛道
當學般若波羅蜜菩薩摩訶薩知諸法實相
無取無捨無所破壞行不可得般若波羅蜜
以大悲心還修福行福行初門先行布施菩
薩行般若波羅蜜智慧明利能分別施福施
物雖同福德多少隨心優劣如舍利弗以一
鉢飯上佛佛即迴施狗而問舍利弗汝以飯
施我我以飯施狗誰得福多舍利弗言如我
解佛法義佛施狗得福多舍利弗者於一切
人中智慧最上而佛福田最爲第一不如佛
施狗惡田得福極多以是故知大福從心不
在田也如舍利弗千萬億倍不及佛心問曰

如汝說福田妙故得福多而舍利弗施佛不
得大福荅曰良田雖復得福多而不如心所
以者何心爲內主田是外事故或時布施之
福在於福田如億耳阿羅漢昔以一華施於
佛塔九十一劫人天中受樂餘福德力得阿
羅漢又如阿輸迦王小兒時以土施佛主閻
浮提起八万塔最後得道施物至賤小兒心
淨但以福田妙故得大果報當知大福從良
田生若大中之上三事都具心物福田三事
皆妙如般若波羅蜜初品中說佛以好華散
十方佛

復次又如以般若波羅蜜心布施無所著故

得大果報復次為涅槃故施亦得大報以大
悲心為度一切衆生故布施亦得大報復次
大果報者如是中說生刹刹家乃至得佛者
是問曰云何布施得生刹刹家乃至得佛答
曰若有人布施及持戒故得人天中富貴如
有人至心布施持戒故生刹刹家刹刹者王
及大臣若著於智慧經書而不惱衆生布施
持戒故生婆羅門家若布施持戒減少而樂
著世樂生居士大家居士者小人而巨富若
布施持戒清淨小勝猷憲家業好樂聽法供
養善人生四天王處所以者何在彼有所須
欲心生皆得常見此間賢聖善人心生供養以

近修福處故若布施持戒清淨供養父母及其所尊心欲求勝生三十三天若布施持戒清淨而好學問心意柔和生夜摩天若布施持戒清淨令二事轉勝好樂多聞分別好醜愛樂涅槃心著功德生兜率天若布施深心持戒多聞好樂學問自力生活生化樂天若布施時清淨持戒轉深好樂多聞自貴情多不能自苦從他求樂生他化自在天他所思惟勤心方便化作女色五欲奪而自在譬如庶民苦身自業強力奪之復次布施時以願因緣故生天上如經說有人少行布施持戒不知禪定是人間有四天王天心常志願佛

言是人命終生四天上必有是處乃至他化
自在天亦如是復次有人布施持戒修布施
時其心得樂若施多樂亦多如是思惟捨五
欲除五蓋入初禪乃至非有想非無想天亦
如是四禪四無色定義如上說復次有人布
施佛及佛弟子從其聞說道法是人因此有
施故心得柔軟智慧明利即生八聖道分斷
三結得須陀洹果乃至佛道亦如是因是布
施聞其說法便發阿耨多羅三藐三菩提心
復次未離欲布施生人中富貴及六欲天中
若離欲心布施生梵世天上乃至廣果天若
離色心布施生無色天中離三界布施爲涅

槃故得聲聞道布施時惡獸憤鬧好樂閑靜
喜深智慧得辟支佛布施時起大悲心欲度
一切第一甚深畢竟清淨智慧得成佛道

復次舍利弗菩薩摩訶薩行般若波羅蜜布施
時以慧方便力故能具足檀波羅蜜尸羅波
羅蜜羼提波羅蜜毗梨耶波羅蜜禪波羅蜜
般若波羅蜜舍利弗白佛言世尊菩薩摩訶
薩云何布施時以慧方便力故具足檀波羅
蜜乃至般若波羅蜜佛告舍利弗施人受人
財物不可得故能具足檀波羅蜜罪不罪不
可得故具足尸羅波羅蜜心不動故具足羼
提波羅蜜身心精進不懈息故具足毗梨耶

波羅蜜不亂不味故具足禪波羅蜜。知一切法不可得故具足般若波羅蜜。具足義先已廣說慧方便。今此中說所謂三事不可得者。更問曰：慧方便者能成就其事，無所破壞，更無所作。今破此三事，應墮斷滅。云何言慧方便？答曰：有二種不可得一者，得不可得；二者，不得不可得。得不可得者，墮於斷滅。若不得不可得者，是為慧方便。不墮斷滅。若無慧方便，布施者取三事相若，以三事空則取無相。有慧方便者，從本以來不見三事相，以是故慧方便者不墮。有無中復次，布施時壞諸煩惱，是名慧方便。復次於一切衆生起大悲心。

布施是名慧方便復次過去未來無量世所
修福德布施迴向阿耨多羅三藐三菩提亦
名慧方便復次於一切十方三世諸佛及弟
子所有功德憶念隨喜布施迴向阿耨多羅
三藐三菩提是名慧方便如是等種種力是
爲慧方便義乃至般若波羅蜜慧方便亦如
是復次舍利弗菩薩摩訶薩欲得過去未來
現在諸佛功德當學般若波羅蜜問曰過去
佛功德已滅未來佛功德未有現在佛功德
不可得又三世中他功德皆不可得云何言
欲得三世佛功德當學般若波羅蜜荅曰不
言欲得三世佛功德自欲得如三世佛功德

無所減少耳所以者何一切佛功德皆等無
多無少問曰若介者何以言阿彌陀佛壽命
無量光明千万億由旬無量劫度衆生答曰
諸佛世界種種有淨不淨有雜如三十三天
品經說佛在三十三天安居自恣時至四衆
久不見佛愁思不樂遣目連白佛言世尊云
何捨此衆生住彼天上時佛告目連汝觀三
千世界目連以佛力故觀或見諸佛爲大衆
說法或見坐禪或見乞食如是種種施作佛
事目連即時五體投地是時須彌山王跋踐
大動諸天皆大驚怖目連涕泣稽首白佛佛
有大悲不捨一切作如是種種化度衆生佛

告目連汝所見甚少過汝所見東方有國純
以黃金爲地彼佛弟子皆是阿羅漢六通無
礙復過是東方有國純以白銀爲地彼佛弟
子皆學辟支佛道復過是東方有國純以七
寶爲地其地常有無量光明彼佛所化弟子
純諸菩薩皆得陀羅尼諸三昧門住阿耨跋
致地目連當知彼諸佛者皆是我身如是等
東方恒河沙等無量世界有莊嚴者不莊嚴
者皆是我身而作佛事如東方南西北方四
維上下亦復如是以是故當知釋迦文佛更
有清淨世界如阿彌陀國阿彌陀佛亦有嚴
淨不嚴淨世界如釋迦文佛國諸佛大悲徹

於骨髓不以世界好醜隨應度者而教化之
如慈母愛子子雖沒在廁溷勤求拯拔不以
為惡

大智度論卷第三十二

名

羸反力垂冶音野鼓石上錮澡音早

友擾音遠摧音下腐音昨籌音直

整整之領反濡作二惡音下憤字

鬧上妹跛反俱踐上我涕音下廁反

上初使去反作困下拯上拔上蒸音

